

**Incumbensa Della Vedova concernent ina candidatura dal Grischun sco lieu per realisar  
ils campiunadis mundials da mastergns (WorldSkills) 2023**

Il sistem dual da la furmaziun professiunala è in factur da success decisiv per la Svizra sco lieu economic e vegn sustegnì e promovì cuminaivlamain da la confederaziun, dal chantun e da l'economia. Ils partenaris da la furmaziun professiunala sin plaun naziunal e chantunal fan dapi onns gronds sforzs per render pli enconuschenta la furmaziun professiunala e sias pussaivladads ad ina vasta publicitad. Ina pussaivladad en quest connex porschan ils campiunadis professiunals (SwissSkills, EuroSkills, WorldSkills) che rinforzan la furmaziun professiunala e la preschentan sco factur economic impurtant en la regiun, ma er sin plaun naziunal ed internaziunal.

La Svizra fa mintgamai fitg buns resultats a chaschun da quests campiunadis. Als campiunadis mundials da mastergns da quest onn ad Abu Dhabi ha la delegaziun svizra terminà uschè bain sco anc mai. L'equipa naziunala ha gudagnà gist 20 medaglias, da quellas 11 d'aur. Uschia ha la Svizra occupà il segund rang suenter la China. Ina medaglia d'aur è er ida en il chantun Grischun.

La fundaziun SwissSkills, la confederaziun ed il chantun Basilea-Citad han gì dacurt l'intenziun da candidar per la realisaziun dals campiunadis mundials da mastergns 2021 (WorldSkills) a Basilea. Suenter che la confederaziun è sa retratga, han las duas autras instituziuns concludì da desister d'inoltrar ina candidatura. Sin la pagina d'internet da la confederaziun, sut «Servetschs dal parlament», pon ins leger il suandant: «Pervia da la situaziun finanziaria ha il cussegl federal decidì da betg metter a disposiziun ils meds finanzials da 30 milliuns francs per realisar ils campiunadis mundials da mastergns WorldSkills 2021 a Basilea, cumbain ch'ils daners èn previs en la missiva FPI. La cumissiun per scienza, educaziun e cultura dal cussegl naziunal n'ha betg pudì s'exprimer davart questa decisiun. Ina candidatura per ils WorldSkills 2021 n'è displaschaivlamain betg pli pussaivla. La Svizra pudess dentant candidar per la realisaziun dals WorldSkills 2023.»

Quests plets dal cussegl federal porschan maun per ina nova candidatura. Sut quest aspect fai senn da far ponderaziuns en chausa e d'examinar seriusamain questa nova candidatura per realisar in campiunadi mundial da mastergns «WorldSkills» en il Grischun. Cun questa occurrenza pudessan la Svizra en general ed il chantun Grischun en spezial sa preschentar ad in vast public en Svizra ed a l'exteriur sco center economic impurtant e sco lieu da furmaziun. Tut ils gremis impurtants (secretariat da stadi per furmaziun, retschertga ed innovaziun SEFRI, SwissSkills) ch'èn responsabels per questa procedura da candidatura sin plaun internaziunal, èn s'engaschads gia a chaschun da l'emprima candidatura e s'engaschan tschert er a chaschun d'ina nova candidatura.

Als ultims «WorldSkills» 2017 ad Abu Dhabi èn sa participads 1300 mastergnantas e mastergnants. Passa 100 000 visitadras e visitaders han – durant in'emna – persequità al lieu las concurrenzas en passa 51 professiuns. Il chantun Grischun è versà d'organisar occurrenzas grondas cun attracziun internaziunala. La realisaziun dal campiunadi mundial da mastergns «WorldSkills» 2023 pussibilitass tranter auter d'augmentar la valur dal concept dals alloschis temporars e modulars ch'era vegnì sviluppa gia per la candidatura per ils gieus olimpics 2022.

La regenza vegn incumbensada d'examinar ina candidatura individuala per ils campiunadis mundials da mastergns «WorldSkills» 2023 u pli tard. Sco alternativa en segunda prioritad po vegnir considerata er ina candidatura en collavuraziun cun il chantun Son Gagl e cun il principadi da Liechtenstein.

Cuira, ils 5 da december 2017

**Della Vedova**, Felix (Haldenstein), Heiz, Albertin, Alig, Atanes, Baselgia-Brunner, Berther (Mustér), Blumenthal, Bondolfi, Brandenburger, Bucher-Brini, Buchli-Mannhart, Burkhardt, Caduff, Cahenzli-Philipp, Caluori, Casanova (Glion), Casanova-Maron (Domat), Casty, Casutt-Derungs, Cavegn, Caviezel (Cuira), Caviezel (Tavau Clavadel), Clalüna, Clavadetscher, Danuser, Darms-Landolt, Deplazes, Dermont, Dosch, Engler (Tavau Vitg), Epp, Fasani, Florin-Caluori, Foffa, Geisseler, Giacomelli, Grass, Gunzinger, Hardegger, Hitz-Rusch, Holzinger-Loretz, Jaag, Jeker, Jenny, Joos, Kasper, Koch (Igis), Kollegger, Kunfermann, Kunz (Fläsch), Kunz (Cuira), Lamprecht, Locher Benguerel, Mani-Heldstab, Märchy-Caduff, Marti, Michael (Donat), Michael (Castasegna), Monigatti, Nay, Niederer, Niggli (Samedan), Noi-Togni, Papa, Paterlini, Perl, Peyer, Pfäffli, Pfenninger, Pult, Salis, Sax, Schneider, Schutz, Steck-Rauch, Steiger, Stiffler (Tavau Plaz), Tenchio, Thomann-Frank, Thöny, Tomaschett (Breil), Tomaschett-Berther (Trun), Troncana-Sauer, Valär, Vetsch (Claustra Vitg), Vetsch (Pragg-Jenaz), von Ballmoos, Waidacher, Weber, Weidmann, Widmer-Spreiter, Wieland, Zanetti, Berther (Segnas), Engler (Surava), Grünenfelder Hunger, Pfister, Wellig